

կար: Երբ զուգը և քուրտք Հայոց վրայ հարուած բերին, պատարիարքն թողուց զԵգիպտոս և ելաւ գնաց յԵրուսաղէմ, հետը տանելով 75 Սուրբ Գիրք, որոց մէջ կար և օրինակ մի չորից Աւետարանաց պէսպէս գոյնեղով և ոսկեով՝ պայծառազարդ պատկերօք հրաշագործութեանց Քրիստոսի, որ փառաւորեալ ըլլայ»:

«Պատրիարքին ճամբորդութիւնն սկսաւ շաքաթ օր Հատուր ամսոյ 15ին (Նոյեմբեր), Մարտիրոսաց 888 թուին (1172 Քրիստոսի), որ համեմատի Հիճր. 569 տարւոյ Ռապի Էվվէլ ամսոյ 23ին: Կ'ըսուի, թէ Երուսաղէմէն դուրս վանք մը շինեց. եկեղեցի մ'այլ յանուն Ս. Սարգսի, سرکس որ է նոյն Ապու Սիրճա ابو سرجه կոչուածն. և այս եկեղեցւոյս փոխադրեց բոլոր սեղանոյ սպասքն և ոսկի դահեկանքն. Կ'ըսուի այլ թէ 20 միանձունք կային այս վանաց մէջ»:

«Պատրիարքն իրեն փոխանորդ քահանայ մի թողուց ի Գահիրէ, անոր որդւոյն հետ, որ ժամաստցութիւն և պատարագ կատարեն ըստ պատշաճ ժամանակի, Յովհ. Մկրտիչի եկեղեցւոյն մէջ, որ ի Հարա Զաւիլա՝ անտարատ Տիրամօր մատրան (եկեղեցւոյ) վրայ շինուած է, ինչպէս առաջ ըսինք. այս եկեղեցւոյ մէջ ժողովէին ընկերութիւն մի Հայոց՝ արանց և կանանց: Իսկ ասոնց ունեցած վանքն եկեղեցիներով մէկտեղ՝ ամայի թողուցան, և դռներն այլ փակուեցան: — Երբ լուր եղաւ որ պատարիարքն յԵրուսաղէմ եկաւ հասաւ անվտանգ, բոլոր քրիստոնեայք ընդ առաջ գնացին իրեն ուրախութեամբ և խնդութեամբ, հանդերձ սաղմոսերգութեամբ, և առջենէն խաչեր և վառած ջահեր տանելով և բուրվառներով խնկելով: — Ասկէ վերջը պատարիարքն հանգիստ ապրեցաւ քիչ մ'ատեն, և ապա հանգեաւ ի շնորհն Աստուծոյ, որ գովեալ ըլլայ, Տուրի ամսոյ հինգին (որ համեմատի Դեկտ. 27-յանու. 25). ի նոյն վերոյիշեալ տարին, և թաղուեցաւ ի վանս Ս. Յակովբայ Զերեղեան յԵրուսաղէմ: — Սա ազնուաբարոյ անձ մի էր, գեղեցիկ տեսքով, վայելուչ հասակաւ. երեսքն մօրուօք մօռուօք պատած, որ ալեւորած էին, և տարւօքն այլ իբրեւ ութսունամեայ էր»:

«Կ'ըսուի թէ յԵրուսաղէմ նստող հայ եպիսկոպոսն՝ տեսնելով որ ամենքն կ'երթան տեսնուելու այս սուրբ պատրիարքին հետ, իր ազնուական բարուց համար, նախանձելով վրան՝ թոյն խմցուց, եւ մահը պատճառեց: Բայց Աստուած յաջողութիւն